

# **Ino Turakki Pablo Sino Colosasira Ino Mapeafu Sitawa Turak**

Iyawa turak, neturakki Pablo sino mangu-  
ruwira sey Colosas a tata lubbunna Asia Menor.  
Bakkanni Pabloweno palunguwa nanuldu sino  
manguruwira sinay, e ammenera dinorawan  
(2:1), udde nekalonera kepay, e kanayunnera a  
ikararan.

Nadamagi Pablo si agyanino nanulduwera  
si bakkanna gakkurug sino nakkakarampat-  
tira a mangurug sey Colosas. Ino netuldura,  
nu anggangkanuweno tolaya mesalakan anna  
ammuwani Dios si fustu, wara nad idaggana  
sino angngurungnga ki Kristo. Tuntulanna  
naddino korwana kammara annino sapitan ire-  
naya manuldu, anna dayawanna naggappayino  
anghelira.

Kunnantu, neturakki Pablo yaw sino nangu-  
ruwira ta ipakaammuna sikwareno kakuruwana  
mappeafu ki Jesu Kristo. Sinapi'na si i Jesusino  
nepamaratuwi Dios si ammin, antu gafuna, nat-  
uray amma sino ammina anghel annino kor-  
wanira a ammena maita. Agyangkappay sikwa-  
neno ammina kinadosino Amana, e awana ko-  
rwana naggabwatanino bawuwa biyayino man-  
gurug nu bakkan sikwana. Kunnantu, amme  
nad tuntulannino manguruwireno aggangwa  
anna lintiyino tolayira, nu ammena luri Kristo  
pelangino tuntulan anna talakkanda.

## **Ino Bagga'na Yaw**

Ino gafuneno turak 1:1-2

Ino karari Pablo para sino manguruwira sey  
Colosas 1:3-14

Ino kinadiosi Kristo annino inangwana 1:15-23

Ino nasserbiyani Pablo sino ammina manguruwira 1:24-2:5

Ino meannunga akwanino manguruwira gafu  
sino nittatanda ki Kristo 2:6-23

Ino dadan andino bawuwa biyag 3:1-4:6

Ino ambu'nenno turak 4:7-18

### *Ino Gafuneno Turak*

<sup>1</sup> Ikkanaki Pablo a apostoli Kristo Jesus gafu se antuweno urayi Dios. Ana kappay sitawi Timoteo a kolattam. <sup>2</sup> Antuyawino tura'mi sikwayuwa tolayi Dios sitan Colosas a natalakka kakkola'miya nangurug ki Kristo. Allakan-dakayu naddi Dios a Amatam e passiyankanna naddino nakandaw.

### *Ino Karari Pablo Para Sino Manguruwira Sey Colosas*

<sup>3</sup> Kadda ikararammikayu, kanayungkamiya mappasalamat ki Dios a Ama i Jesu Kristo a Afutam, <sup>4</sup> se nadamammiyeno mappeafu sino angnguruddaw ki Kristo Jesus annino aggangandaw sino ammina tolayi Dios. <sup>5</sup> Ino angnguruddaw annino aggangandaw, maggabwatira sino innanamandaw a appandona a neimfuni Dios sey langit para sikwayu. Inammuwandaw yawa innanamandaw sin naningngaggandaw sino nalawara damaga antuweno kakuruwana netuldumi sikwayu si'in. <sup>6</sup> Iyawa nalawara

damag, mebabanyag sino ammina lulubbun sito lubag, e pabbawunneno katotolayino odduwera a maningngag anna mangurug. Kunna kappayino nakwa sikwayu mangiyafu sin naningngaggandaw mappeafu sino angnikallakki Dios e naammuwandaw si antuweno kakuruwan. <sup>7</sup> Ino palunguwa nanuldu sikwayu mappeafu sitaw, i Epafras a iiddukammiya bulummi. Matalakka masserbi ki Kristo, e antuweno pannakabag-gimiya manuldu sikwayu. <sup>8</sup> Antu kappayino nipakaammu sikwami mappeafu sino aggangandaw sino bafulundawira a neya'deno Espirituwi Dios.

<sup>9</sup> Antu gafuna, mangiyafu sin nadamamiyeno mappeafu sikwayu, kanayummikayuwa ikararan. Ilyawammi ki Dios ta iya'deno Espirituna sikwayuweno ammina kinalaing anna pannakaammu takesi maammuwandaw si nalawarino anggammi Dios a akwandaw. <sup>10</sup> Se nu kunnenoy, meannungino biyaddaw sino nittatandaw ki Afu Jesus e kanayundawa akwanino pangammanna. Umooddu naddino ammina nalawara akwandaw gafu sino nangammuwandaw ki Dios.\* <sup>11</sup> Pattuyaggan naddi Diosino angnuruddaw gafu sino pannakadamana a awana kakunnana, takesi massiki sanneno makwa sikwayu, damayuwa attamman e maanggangkayu kappay. <sup>12</sup> Kanayungkayu nadda mappasalamat ki Dios a Amatam a nanga'da sikwatam sino

---

\* **1:10** 1:10 Ino tata kappaya anggamma sapitan: Umooddu naddino ammina nalawara akwandaw anna madadagannan naggappayino angngammuyu ki Dios.

kalintiyana makiyadwa sino nedadanna para sino tolenera a nesapat sino nabaggawingke a patturayanna. <sup>13</sup> Se nesala'detam sino pannakadama i Satanas a matturay sino lammuka pagyanan, e nesapa'detam sino patturayanino iiddukanna a Abbing <sup>14</sup> a nanubbut sikwatam ta mawayanetam, ino anggama sapitan, napakomanino liwattam gafu sino nesapatantam sikwana.

### *Ino Kinadosi Kristo Annino Inangwana*

<sup>15</sup> I Kristoweno nangipaita sino kinadosi Dios a ammena maita. Anen sin ammena kepay napatu yo lubag, e napatig amma sino ammina pinaratuwi Dios. <sup>16</sup> Se antuweno nepamaratuwi Dios si ammina ana sey langit anna sito lubagga maitera andino ammera maita, mampesino pangafuwanira andino tatturayirana anghel andino korwanira kappaya ammena maita. Amminire-nay, napatuwera gafu ki Kristo takesi ireno kedayawanna. <sup>17</sup> Sin liyeya napatuweno ingkelamang, agyaninni Kristo, e antuweno mangngal sikwara ammin takesi mainggurira. <sup>18</sup> Antu kappayino makaammu sikwatam ammina mangurug, antu gafuna, meyamparig si ulutam e ikkanetamino gumabbagina. Antu kappayino naggabwatanino bawuwa biyaddam, se antuweno napalunguwa nangngangoli anna ammena kappay matay, takesi antuweno kapap-atiyan si ammin. <sup>19</sup> Se anggammii Dios si magyan amminino kinadosna sino Abbingnga. <sup>20</sup> E di-nandamma si pulinnera sikwaneno ammina ana sito lubag anna sey langit gafu sino Abbingnga,

antu gafuna, inarineno nanaldak sikwara gafu sino ada i Kristo a nebubbu sino natayanna sino krus.

<sup>21</sup> Massiki ikkayu si'in, aroyukayu kepay ki Dios, e kinontarayu gafu sino narakkatta ag-gangwayu anna narakkatta nakandaw. <sup>22</sup> Udde sitoya, nepabbalirakayuwi Dios si bulunna a nepulina sikwana gafu sino natayanino Ab-bingnga sin nabbaliyanna si tolay, takesi nadiosan anna nadaluskayuwa uma'langnga sikwana,<sup>†</sup> e awanna a kabalawandaw. <sup>23</sup> Udde mattalaginaggayu nadda manguruwa awana daladudwana, e ammeyu nad purayan si matu-tunggungangkayuwa mekatway sino innanamantama nasapit sino nalawara damag. Se inaya nalawara damaga diningngaddaw, kakun-neno nepakaammu si ammina lulubbun sito lubag, e antu kappayino nebanyaggu sino nasser-biyangku ki Kristo.

### *Ino Nasserbiyani Pablo Sino Ammina Mangu-ruwira*

<sup>24</sup> Massiki nu madyatanak gafu sino nebanyagguwa pallawarandaw, maanggammak kappay, se inaya nadyatangku, antuweno tubbunnenno dyata inattammani Kristo para sino ammina manguruwa meyampariyira si gumambaggina. <sup>25</sup> Se dinotukandaki Dios a masserbi sino ammina manguruwira, e netala'nga sikwakino tarabafuwa mangipakaammu si fustuwenno sapi'na takesi

---

<sup>†</sup> **1:22** 1:22 Ino tata kappaya anggama sapitan: ...takesi nadiosan anna nadaluskayu sino angngitana.

antuweno pallawarandawa bakkanna Judyu. <sup>26-27</sup> Inaya ipakaammuk, ammena nepakaammu si massiki inya a tolay si'in, udde sito ingkein, dinandammi Dios a ipakaammu sikwatama tolena, mampay sikwayuwa bakkanna Judyu. E antuyawino kalalawaran anna kakka'bawa ipakaammuna: mattalaginari Kristo sikwayu, e antuweno pinnanamandaw si mesapakkayu ki Dios sino kedayawanna. <sup>28</sup> Kunnantu, i Kristoweno ibanyammi si ammina tolay. Usarammiyeno ammina kinalaimmiya mattun anna manuldu sino ammina tolay takesi nanu uma'langira ki Dios, awana pakabalawanda, nu ammena lud meannungino angngurudda sino nittatanda ki Kristo. <sup>29</sup> Iyekwak amminino damak takesi makwanenay, e ino damaka akwan, antuweno pannakadama a iya'da i Kristo sikwak.

## 2

<sup>1</sup> Sinapikku inay se anggangku si maamuwandaw si iyekwak ammina damak para sikwayu sitan Colosas annino manguruwira kappay sey Laodicea andino amminira a korwana ammena kepay nita sikwak. <sup>2</sup> Se anggangku si mattuyaggino nakandaw anna mittatakayu gafu sino pakkaaanggammandaw takesi ammekayu maddaladudwa, nu ammeyu lud maawatanino mappeafu sino amme nepakaammuwi Dios si'in, ino anggamma sapitan, ino mappeafu ki Kristo. <sup>3</sup> Se i Kristoweno pangammuwantam sino ammina neimfuna kinalaing anna dinandammi Dios. <sup>4</sup> Sinapikkuweran inay takesi ammekayu

mabalabaliyan sino bakkanna gakkuruwa tulduweno korwanira, massiki nalawarino assapi'da. <sup>5</sup> Se massiki awanak sikwayu sitan, aggadandammappay sikwayu, e maanggammak sin nadamagguweno nittatandaw si nakam an-nino katuyanggeno angguruddaw ki Kristo.

*Ino Meannunga Akwanino Manguruwira Gafu Sino Nittatanda Ki Kristo*

<sup>6</sup> Gafu se inawa'daw a i Kristo Jesusino Afuyu, maawag si tuntulandawino katotolaya meannung sino tolaya nesapat sikwana.

<sup>7</sup> Ino angguruddaw sikwana, mekunna nad si kayuwa naggamagamut, onnu ino pata'dagganda a balaya natuyaggino arina. Tuntulandonaggappayino netuldu sikwayu mappeafu sikwana takesi mantatuyaggino angguruddaw, e kanayungkayuwa mappasalamat ki Dios.

<sup>8</sup> Palanandaw takesi ammekayu matutungguna manuntul sino bakkanna gakkuruwa tulduwa awana ketupakkanna, se ino kunnenaya tulduwa mamalabali si tolai, ammena naggabat ki Kristo, nu ammena lurino gagangaya dinandammino tolaiyira si'in andino gagangaya tuldura sito lubag.\* <sup>9</sup> Se ino kakuruwan mappeafu ki Kristo, nabbali si tolai, udde ana kepay sikwaneno ammina kinadiosi Dios. <sup>10</sup> Antu gafuna, naturayi Kristo amma sino amminira a ammena maita a pangafuwan anna tatturay, e gafu

---

\* **2:8** 2:8 Ino tata kappaya anggamma sapitan: ...andino narakkattira a espirituwa matturay sito lubag.

sino nittatandaw sikwana, ana sikwayuweno ammina awandaw sino bawuwa biyaddaw.

<sup>11</sup> Gafu kappay sino nittatandaw sikwana, kunnangke namarkangkayuwa pangitan si tolerakayuwi Dios. Inaya nakwa sikwayu, meyamparig si kugit, udde tanganan sino kugit a akwanino tolayira sino baggira, se ino ariyani Kristo ino narakkatta nakantam. <sup>12</sup> Se sin nabawtisarangkayu, kunnangke nesapakkayuwa netanam sino netanammani Kristo e nesapakkayu kappaya nangngangoli sino nangngangoliyanna gafu sino angnguruddaw sino pannakadama i Dios a nappaangngangoli ki Kristo. <sup>13</sup> Si'in, kunnangke natekayu sino angngita i Dios gafu sino liwa'daw anna gafu se ikkayuwa bakkanna Judyu, awana inammuyu mapeafu sino lintiyi Dios. Udde sitoya, nesapa'dakayuwi Dios sino bawuwa biyaya neya'dana ki Kristo, se pinakomanneno ammina liwattam. <sup>14</sup> Ino inangwa i Dios para sikwatam, meyamparig sitaw: inappaneno allistan sino gatut onnu liwattam sikwana a nangiyafu sino ammetam nanuntulan sino lintingnga, e nelansana sino krus, ino anggama sapitan, gafu sino natayani Kristo sino krus, netakkufi Diosino allistan, pati sino lintiyira a nappaliwat sikwatam. <sup>15</sup> Gafu kappay sinaya natayani Kristo sino krus, inariyi Diosino kalintiyano ammera maita a pangafuwan anna tatturay, e nepaitana sino a'langino ammin si inaffu'neran.

<sup>16</sup> Antu gafuna, ammeyu nad kuruwannino mappaliwatira sikwayuwa massapit si tuntulan-donaddino odduwa kammarallanda a kunneno



mappeafu sino makkan anna mainum andino ngilinanda a aw si kadda run, kadda dakkag, andino Sabaduwera a aggimwanganda. <sup>17</sup> Se ammin inaya netuldu si'in, kunnangke alinopelanga maunta sino makwan alinaw. Ino anggamma sapitan, antuweno nangammuwanino tolayira si'in si ananeno mepatali sinayira a lintig. Udde sitoya, ginamwanginni Kristo a antuweno fustuwa mepatali sikwara, e antu naddino tuntulantam. <sup>18</sup> Ammeyu naggappay kuruwanino manandarallira sikwayuwa mipatut si itulu'dawino baggiyuwa manuntul sino kammallanda anna mesapakkayu sino paddayawanda sino anghelira. Inayira a tolai, sapitanda si aneno nepaita sikwara a kunnangke tenap e antuweno pallambawanda sikwayu, udde inaya pidayawanda sino baggira, awana kakuruwana, se naggabwappelang sino nakandangkepay. <sup>19</sup> Nekatwayira ki Kristo a meyamparig si ulutama mangurug, udde ikkanetam, nesapatetam sikwana, se ikkanetamino gumambagina. Ino uluweno makaammu sino ammina partineno baggi takesi appannino kadda tateno awanna e fustuwenno kaingudda annino katutubburanda ammin. Kunnantu, dumokallino baggiya metuntul sino planowi Dios.

<sup>20</sup> Ikkayuwa mangurug, gafu sino nesapatandawa natay sino natayani Kristo, nawayaangkayu sino gagangaya lintig sito lubag.† Ansandolang tuntulangkepayino

---

† **2:20** 2:20 Ino tata kappaya anggamma sapitan: ...nawayaangkayu sino narakkattira a espirituwa matturay sito lubag.

gagangayino tolayira sito lubag? Anсандоланг кuruwangкеpayino lintiddera a kunnayaw:  
<sup>21</sup> “Аmmeyu iggamman yaw! Ammeyu sinsiman yan! Ammeyu senggeran inay!” <sup>22</sup> Se ino ammina makkan andino korwana sapitan inaya lintidda, inangwa i Dios ta usarannino tolayira e maambut. Ino naggabwatan irenaya lintig anna tuldura, ino pelang nakamma tolay.  
<sup>23</sup> Kunnangke aneno pallawarannenaya lintidda, se ino manuntulira sinay, natalanggaddira a maddayaw sino anghelira, itulu'deno baggira a manuntul sino gagangera, e padyatandeno baggirangкеpay. Udde ino kakuruwanna, awana serbi irenaya akwanda a mifuwad sino narakkatta panggammanino baggira.‡

### 3

#### *Ino Dadan Andino Bawuwa Biyag*

<sup>1</sup> Gafu se nesapakkayuwa nangngangoli sino nangngangoliyani Kristo, patiyandonaddino ana sino patturayani Kristo sino padiwanani Dios sey langit. <sup>2</sup> Antu naddino aggadandammandaw, bakkannino ana sito lubag. <sup>3</sup> Se kunnangke natekayun mappeafu sino dadana biyaddaw, e anennino bawuwa biyaddaw, massiki ammena kepay maiteno kekunnanna, se nesapakkayu ki Kristo a nittata ki Dios sey langit. <sup>4</sup> Inaya biyaddaw, antuweno biyayi Kristo. Antu gafuna,

---

‡ **2:23** 2:23 Ino tata kappaya anggamma sapitan: ...awana serbiy-  
 erenaya akwanda, nu ammera lud metupak sino keyakkuruwanino  
 panggammanna baggi.

nanu mappadda kappay, mesapakkayuna sino kinalawanna annino kedayawanna.

<sup>5</sup> Kunnantu, talekkurandonaddino dadana nakam anna aggangwayuwa narakkat a kunneno makidurug si bakkanna atawayu anna mangwa si korwana ka'atal, ino ammina narakkatta kabbatan onnu panggammanino baggi, andino kinaingap, se ino ingapanna tolai, antuweno kunnangke diosna. <sup>6</sup> Gafu sinayira a makwa, kastiguni Diosino ammera mangurug sikwana. <sup>7</sup> E kunnenayino aggangwayu sin ammekayu kepay nangurug.

<sup>8</sup> Udde sito ingkein, ibbattandawin nad amin yaw: ino mabbungut, ino makkalussaw, andino manggamma mangwa si narakkat sino bafulundawira. Ammekayu nad mamaraparal anna massapit si massiki sanna a narakkat. <sup>9</sup> Ammekayu nad makkasirisiri, se inibbattandawinnino dadana nakam anna aggangwayu, <sup>10</sup> e inappayunnino bawuwa nakamma neya'da i Dios a kanayuna pabbawunna makkiyad si mekunnakayu sikwana takesi maawatandawingke ino mapeafu sikwana. <sup>11</sup> Gafu sinaya inangwa i Dios, awaninna naddadarumanino tolai nepabawuna. Massiki Judyu onnu bakkanna Judyu, massiki nakugit onnu ammena nakugit, massiki mangili anna tanakwanino gagangera, massiki aripan onnu bakkanna aripan, nakkakarunnera ammin sino angngita i Dios, se i Kristo pelangino napatig, e ana i Kristo sikwara ammina nangurug.

<sup>12</sup> Kunnantu, gafu se pinilirakayuwi Dios a tolena e iiddukandakayu, kunna nad yawino

aggangwa a tuntulandaw: naallak anna minaduffungkeyu, tagatulutuluk anna naanuskeyu. <sup>13</sup> Anusandonaddino pakkuranganino bafulundawira anna makkapakapakomakayu nad nu wara parririyandaw onnu wara malliwat sikwayu a kunna payino inangwa i Afu Jesus a namakoma sikwayu. <sup>14</sup> Ino agganggam, antuweno idaggayu nad sinayira ammina nalawara aggangwa, se nu makkaaaggangkayu, awana kuranggeno pittatanneno nakandaw. <sup>15</sup> Ino nasiyanakka nakam annino kinainggura iya'da i Kristo, ira naddino kanayuna mifuyut sino nakandaw, se ino gafuneno nisapatani Dios sikwayu sino tata a baggiyi Kristo, takesi masiyanakkino nakandaw anna maingguggayu. E ammeyu nad kalyawana mappasalamat sikwana. <sup>16</sup> Aggadandammandonaddino napatiya netulduwi Kristo. Usarandonaggappayino ammina kinalainga iya'dana a makkatutuldu anna makkatutun. Kantandonaddino nekansiyona sapi'na Salmo, ino kanta a paddayaw ki Afu Jesus, andino kanta a mappatuyag sino angguruddaw, gafu se anggandawa mappasalamat ki Dios. <sup>17</sup> Massiki sanneno akwan anna sapitandaw, meannunggad sino tolaya nesapat ki Afu Jesus, e mappasalamakkayu kappay ki Dios Ama gafu sikwana.

*Ino Tuldu Mapeafu Sino Taabbalayanira  
(Efeso 5:22-33; 1 Ped. 3:1-7)*

<sup>18</sup> Ikkayuwa bafabbay, natulukkeyu nad sino a'atawayuwera, se antuweno meannunga akwanino mangurug ki Afu Jesus. <sup>19</sup> Ikkayuwa

lallaki, anggammandonaddino a'atawayuwera. Ammekayu nad mabbungubungut sikwara, nu ammekayu lud nannakam sikwara.

<sup>20</sup> Ikkayuwa aanak, kanayundonadda kuruwannino mapparana'dawira, se antuweno panggamani Dios, e antu kappayino meannunga akwanino mangurug. <sup>21</sup> Ikkayuwa mapparanak, ammeyu nad fulotana aallangnganino ana'dawira, takesi ammera madismaya.

*Ino Tuldu Mapeafu Sino Aripannira Annino Mangaripannira*

*(Efeso 6:5-9; Tito 2:9-10; 1 Ped. 2:18-20)*

<sup>22</sup> Ikkayuwa aripan, kuruwandonaddino ammina sapitannino mangaripannira sikwayu sito lubag. Bakkampelangino pangitanda sikwayuweno pallappattandaw sino tarabafuyu ta anggammadakayu, nu ammekayu lud maanggamma mangwa sino ipangwara gafu sino angngiyataldaw ki Afu Jesus. <sup>23</sup> Massiki sanneno akwandaw, iyekwayuweno damayuwa mangwa a kunnangke i Kristoweno passerbiyandawa bakkampelanga tolay. <sup>24</sup> Se ammuyu si iya'dana i Afu Jesus sikwayuweno labuta nekarina sino tolenera, se i Kristoweno Afuwa gakkuruwa passerbiyandaw. <sup>25</sup> E ino kappay mangwa si narakkat, meannungngeno kastiguna sino narakkatta inangwana, se awana ta'wiyanni Dios sino pangukumanna sikwara.

## 4

<sup>1</sup> Ikkayu paya mangaripan, nalawannad anna naggaddangngino akwandaw sino aripandaw, se

ammuyu si ana payino Afuyu sey langit.

*Ino Tuldu Mapeafu Sino Ammina Mangurug*

<sup>2</sup> Kanayungkayu nad ammina makkararag, dandammandonaddino sapitandaw nu makkararaggayu, e mappasalamakkayu kappenad ki Dios. <sup>3</sup> Ikararandakami kappay takesi a'dandakamiyi Dios si wayamiya mangibanyag sino kakuruwan mapeafu ki Kristo a ammena nepakaammu si'in, se antuweno gafuneno nabalurangku sito ingkein. <sup>4</sup> Ikararandak takesi nalawarino annullduk e naladda a maawatan, se antu naddino akwangku.

<sup>5</sup> Nalawannaddino akwandaw sino ammera mangurug takesi awana kabalawandaw sikwara, e kanayungkayu nadda nadadana massapit sikwara sino mapeafu ki Kristo. <sup>6</sup> Kanayun nadda mappaanggammino assapi'daw e nalawara dingngaggan, e nadadangkayu nadda manombat si massiki inya a mabbebut sikwayu ta fustuweno isomba'daw.

*Ino Ambu'nenno Turak*

<sup>7</sup> I Tikicoweno dundunangku sikwayu takesi ipakaammuneno ammina nakwa sikwak. Antuweno tata a iiddukangkuwa kola'tama matalakka bulungkuwa masserbi ki Afu Jesus. <sup>8</sup> Antuweno panundunangku sikwana sikwayu ta ipadamangngeno makwa sikwami sitaw anna takesi pallampawanneno nakandaw. <sup>9</sup> Mebulungkappayi Onesimo a iiddukammiya kalubbunandawa matalakka kolattam. Iraneno

mangipakaammu sikwayu sino ammina makwa sitaw.

<sup>10</sup> I Aristarco a bulungkuwa balud anna i Marcos a kapinsani Bernabe, aggadandammandakayu. (Naammuwandawinnino netungku sikwayu mappeafu ki Marcos, a nu gumamwang sitan, pagamwangandonad si nalawad.) <sup>11</sup> I Jesus a mingngangkappay si Justo, aggadandangkappay sikwayu. Sino amminira a Judyu a mangurug sitaw, ira pelanga talluveno manuffun sikwaka manuldu mappeafu sino patturayani Dios, e nalampawino nakangku gafu sino odduwa dufunda sikwak.

<sup>12</sup> I Epafras a tata kappaya kalubbunandawa masserbi ki Kristo, aggadandangkappay sikwayu. Kanayuna iyekwanangkeno damana a mikararag sikwayu takesi mattuyangngaddino angnguruddaw anna awana pakkurangandaw, takesi mattalanggaggayuwa mangammu anna mangwa sino ammina panggammani Dios. <sup>13</sup> Ta'dagganku si nalappatta mattarabafu para sikwayu anna para sikwara kappaya mangurug sey Laodicea anna sey Hierapolis. <sup>14</sup> I Lucas a iiddukammiya doktor anni Demas, aggadandammira kappepay sikwayu.

<sup>15</sup> Sapitandokappay sino kakkolattamira a mangurug sey Laodicea si aggadandammanguwera, kunna kappay ki Nimfas andino manguruwira a makkakarampatta maddayaw ki Dios sino balena. <sup>16</sup> Nu masinduyuwa basan yawa turak, peiyandaw sino manguruwira sey Laodicea ta basanda pay. Kaseyu kappay appannino turakku sikwara ta

basandopay sitan Colosas. <sup>17</sup> Sapitandokappay ki Arkipo si balinanna naddino tarabafuwa netalakki Afu Jesus sikwana.

<sup>18</sup> Ikkanaki Pablo a nanurak sito ambu'na yawa turakka nepeturakku. Ammeyu nad kalyawan si aggabalurak.

Allakkandakayu naddi Dios.



**Ga'dang**  
**Ga'dang: Ga'dang New Testament**

copyright © 2001 Wycliffe Bible Translators, Inc.

Language: Ga'dang

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d27dc212-1a55-5d51-8f9d-54742e300a0f